

摘藻堂四庫全書薈要

集部

欽定四庫全書薈要

集部

宋文鑑卷八十五

三至

詳校官候選知縣臣吳甸華

欽定四庫全書薈要卷二萬六

集部

宋文鑑卷八十三

宋 呂祖謙 編

記

黃州快哉亭記

蘇 轍

江出西陵始得平地其流奔放肆大南合湘沅北合漢
沔其勢益張至於赤壁之下波流浸灌與海相若清河
張君夢得謫居齊安即其廬之西南為亭以覽觀江流
之勝而余兄子瞻名之曰快哉蓋亭之所見南北百里

東西一舍濤瀾洶涌風雲開闔晝則舟楫出沒於其間
夜則魚龍悲嘯於其下變化倏忽動心駭目不可久視
今乃得翫之几席之上舉目而足西望武昌諸山岡陵
起伏草木行列煙消日出漁父農夫之舍皆可指數此
其所以為快哉者也至於長洲之濱故城之墟曹孟德孫
仲謀之所睥睨周瑜陸遜之所騁騫其流風遺迹亦足
以稱快世俗昔楚襄王從宋玉景差於蘭臺之宮有風
颯然至者王披襟當之曰快哉此風寡人所與庶人共

者耶宋玉曰此獨大王之雄風耳庶人安得共之玉之言蓋有諷焉夫風無雄雌之異而人有遇不遇之變楚王之所以為樂與庶人之所以為憂此則人之變也而風何與焉士生於世使其中不自得將何往而非病使其中坦然不以物傷性將何適而非快今張君不以謫為患竊會計之餘功而自放山水之間此其中宜有以過人者將蓬戶甕牖無所不快而况乎濯長江之清流挹西山之白雲窮耳目之勝以自適也哉不然連山絕

壑長林古木振之以清風照之以明月皆騷人詩士之
所以悲傷憔悴而不能勝者烏覩其為快也哉

遺老齋記

蘇轍

庚辰之冬余蒙恩歸自南荒客於潁州思歸而不能諸
子憂之曰父母老矣而居室未完吾儕之責也則相與
卜築五年而有成其南修竹古栢蕭然如野人之家乃
闢其四楹加明窓曲檻為燕居之齋齋成求所以名
之余曰予幼從事於詩書凡世人之所能茫然不知

也年二十有三朝廷方求直言有以余應詔者余采道
路之言論宮掖之秘自謂必以此獲罪而有司果以為
有不遜上獨不許曰吾以直言求士士以直言告我今
而黜之天下其謂我何宰相不得已置之下第自是流
落凡二十餘年及宣后臨朝擢為右司諫凡有所言多
聽納者不五年而與聞國政盖余之遭遇者再皆古人
之希有然其間與世俗從事之不如意者十常六七矣
雖號為得志而實不從余聞之樂莫善於如意憂莫慘

於不如意今余退居一室之間杜門却掃不與物接心之所可未嘗不行心所不可未嘗不止行止未嘗少不如意則予平生之樂未有善於今日者也汝曹志之學道而求寡過如予今日之處遺老齋可也

司馬溫公布衾銘記

范祖禹

溫國文正公所服之布衾隸書百有十字曰景仁惠者端明殿學士范蜀公所贈也曰堯夫銘者右僕射高平公所作也元豐中公在洛蜀公自許往訪之贈以是衾

先是高平公作布衾銘以戒學者公愛其文義取而書於衾之首及寢疾東府治命歛以深衣而覆以是衾公於物澹無所好唯於德義若利欲其清如水而澄之不已其直如矢而端之不止故居處必有法動作必有禮其被服如陋巷之士一室蕭然圖書盈几經日靜坐泊如也又以圓木為警枕小睡則枕轉而覺乃起讀書蓋恭儉勤禮出於天性自以為適不勉而能與二范公為心交以直道相與以忠告相益凡皆如此其誠心終始如

一將歿而猶不忘祖禹觀公大節與其細行雖不可遽數然本於至誠無欲天下信之故能奮然有為超絕古今居洛十五年若將終身焉一起而功被天下內之嬰童婦女外之蠻夷戎狄莫不敬其德服其名唯至誠故也公兄子宏得公手澤紙本於家屬祖禹序其本末俾後世師公之儉云

湖學田記

顧臨

夫惠有術也養有道也一梁之渡人惠之微者也而君

子取之得其術也一井之濟物養之薄者也而聖人取之得其道也子產彘興其為力固勤矣而君子不取非其術也冉子與粟其心固為周矣而聖人不取非其道也所謂術者不在乎豐在乎不費云爾所謂道者不在乎大在乎不窮云爾夫豐而多費知愛於彼而不知愛於此也大而易窮知愛於今而不知愛於後也惟其不費則雖微可尚也惟其不窮則雖薄可貴也吳興學著於天下當其盛時學者不可勝錄然常患惠而養之者

不至也彼千里而來有及門而不能留者有留而不能
久者將返則有戚然不足之歎自學初得賜田五頃而
瀕湖多潦歲入無幾由今樞密胡公為郡始為辦學資
漸以及諸生之寒者繼胡公者或增焉然亦莫之充也
嘉祐中臨常承乏教授計其資十常不能及二三既數
年廼會太守鮑侯軻恤其不給慨然思有以廣其資方
謀諸士僚適聞秀州杉楊涇有民訟田頻年不決官將
兩奪之鮑侯喜曰吾謀得矣廼用書懇請於轉運使願

得貸錢購所爭田以贍學者會轉運使賢樂聞其請遂
用貳錢六十萬得田七頃其田當沃壤舊無曠潦之患
以二年之入償貳錢然後率為學糧歲可以食百員夫
棟宇之固易隳也泉布之富易耗也惟田之息可以需
及無涯語其始可謂惠而不費者也要其終可謂養而
不窮者也世有掠民脂血妄為塔廟之奉在名教之地
則貌而不顧噫不明乎善徒多費而易窮較今日之為
重可取也鮑侯去之二年遇今徐侯來喜其得惠養之

道術而有資於名教然慮歲月之久有攘沒其美者乃
強不敏著于記云

重修御史臺記

曾 肇

元祐三年新作御史臺成有詔臣肇為之記臣肇伏自
惟念幸得備位從官以文字為職此大手筆雖非所克
堪然義不得辭謹拜手稽首而記之曰維御史見於周
掌贊書受灋令而已戰國以致執法亦記事之職也至
秦漢始置大夫位亞丞相副曰中丞督部刺史受公卿

奏事舉劾按章其屬有侍御史出討姦猾治大獄於是
專繩糾之任厥後政事歸尚書而御史與尚書謁者並
為三臺大夫更為三公而中丞為臺率與尚書令司隸
校尉朝會皆專席為三獨坐隋唐復置大夫天下有冤
而無告者得與中書門下省詰之謂之三司自是御史
益為雄峻其屬則有殿中監察并侍御史為三院侍御
史一人知雜事橫榻而坐謂之南牀皆專彈劾不言事
本朝因之至真宗皇帝增置言事御史其後皆得言事

御史相率廷辯小則人得自達故其任視前世為尤重
非但謹朝會聽獄訟而已列聖相繼皆假以寬仁使得
自竭是以風采所加百僚震肅朝廷倚而益尊姦邪望
而知畏初本朝雖因唐制然以大夫為兼官不治臺事
以郎中員外郎兼侍御史知雜事以貳中丞以太常博
士以上為三院未至者則為御史裏行監察故事內察
尚書六曹外巡按郡縣久之亦廢至神宗皇帝大正官
名始歸大夫職以侍御史治雜事罷御史裏行而復六

察官分守既定廼相官府蓋御史臺建於宣化坊自開

寶五年纔有東西獄七年雷德驤分判三院事請於上

而大之屋不及百楹天禧二年復詔增廣遂至三百六

十楹訖于元豐垂七十年寢以圯壞神宗皇帝倂圖程

工以授有司舊闕大夫聽事踵鄴都制度闕門北鄉取

陰殺之義又形勢庫下無以重威至是命置大夫聽事

闕門東鄉增庫為崇培下為高其規撫宏遠矣繼志述

事屬于後人今上即政之初務先崇儉土木之勤咸詔

勿事惟臺之建實遵先訓猶以大夫虛員姑省營築闢
門北鄉仍故不改經度損益斷自聖心以元祐二年六
月己亥始事三年八月庚辰卒功用人力十萬五千為
屋三百五十一楹視舊小貶而亢爽過之門闥眈眈堂
室渠渠長貳佐屬視事燕休翼翼申申各適所宜吏舍
囚圉深靚嚴固案牘簿書棲列有序所以觀示都邑表
正憲度揆諸典章於是為稱昔周人考室見於風雅魯
國作門記諸春秋後世傳誦為載籍首恭惟神宗皇帝

受命承序十有九年建立經常皆應古義好惡無私賞
罰不僭而綱紀是張宮室弗營池籩苟完而府寺是崇
故能垂精風憲之司以啓後嗣之意二聖恭已開闢言
路聰無不聞明無不燭士有以言獲福不聞忠以取禍
耳目之地寵遇莫抗故能新是棟宇以成前人之志是
宜著在文字刻之金石以度越周魯垂休無窮顧臣之
愚言語淺陋何足以發揚聖德稱明詔之萬一哉雖然
臣嘗聞之責人非難責己惟難御史責人者也將相大

臣非其人百官有司失其職天下之有敗法亂紀服讒
蒐慝者御史皆得以責之然則御史獨無責乎哉居其
位有所不知知之有所不言言之有所不行行之而君
子病焉小人幸焉此御史之責也御史雖不自責天下
得以責之惟其不難於責已則施於責人能稱其任矣
能稱其任然後危冠盛服崇墉峻宇游焉息焉可以無
媿苟異於是得無餒於中哉臣故不自揆輒因承詔誦
其所聞以告在位者使有以仰稱列聖褒大宗顯之意

焉

適南亭記

陸佃

會稽為越之絕而山川之秀甲於東南自晉以來高曠
宏放之士多在於此至唐餘杭始盛而與越爭勝見元
白之稱然杭之習俗華媚善占形勝而丹樓翠閣映輝
湖山如畫工小屏細巧易好故四方之賓客過而覽者
往往後越夫越之美豈至此而窮哉意者江山之勝雖
在而昔賢往矣距今千歲幽深寂寞殆有鬱而不發者

也熙寧十年給事中程公出守是邦公吏師也所至輒治故其下車未幾弗出庭戶之間而政成訟清州以無事乃與賓客泂鑑湖上叢山以尋將軍秘監之跡登望稍倦未愜公意於是有以梅山勝告公者蓋其地昔子真之所居也今其少西有里曰梅市其事應史公聞往焉初屆佛刹橫見湖山一面之秀以為未造佳境也因至其上望之是日也天和景晴竹莖尚踈木葉微合峰巒如削間見層出公曰此山之佳處也已而北顧見其

煙海杳冥風帆隱映有魁偉絕特之觀而高情爽氣適
相值也夕陽在下不得已而後去其山之僧用和者契
公之意因高構宇名之曰適南蓋取莊周大鵬圖南之
義暇日以衆飲而賞焉水挹青山轉望轉碧而俯仰之
間海氣浮樓臺野氣墮宮闕雲霞無定其彩五色少頃
百變殆詞人畫史不能寫也於是闔州以為觀美而春
時無貴賤皆往又其風俗潔雅嬉遊皆乘畫舫平湖清
淺晴天浮動及登是亭四眺無路風輕日永若在蓬萊

之上可謂奇矣然則所謂餘杭者未必如也公蘇人也
自其少時已有詩名咳唾成珠人以傳玩則模寫物象
道所難言其在公賦之乎雖然公之美志喜於發揚幽
懿豈特賁一山而已凡此鄉人藏道蓄德晦於耕隴釣
瀨屠市卜肆魚鹽之間者天子仁聖拔用忠賢夢想多
士斯可以出矣庶幾託公之翼搏風雲而上哉

蜀州重修大廳記

呂陶

古之循吏以郡縣為一家視其民如所親之於子弟待

之以忠厚樂易之誠濟之以勤勞不怠之力事不問巨

細苟可以興作營置區處辦具則莫不盡心焉建校舍

選開敏吏自訓飭之減用度遣詣博士為學子除更繇

與俱行縣通渠瀆廣陂湖起蕪廢溉田至數萬頃躬率

儉約勸督務農出入阡陌舍止鄉亭輕刀劍重牛犢鑄

田器教犁耕親度頃畝差肥瘠為三等立文簿藏之鄉

縣鑿山通道列亭傳置郵驛凡數百里息省勞役還集

流散發倉廩以賑凶旱具葬祭以恤鰥孤限禮聘之年

施四誠之令禁嫁娶送終勿徇奢靡此其事之大者而為之甚詳以至榆莢葱韭口有常數二鴈五雞家有常養種桑柘植麻紵藏果實蓄菱芡養蠶織屨悉有教令此其事之小者而為之亦不略按古而求盖豳公所由之風化而孟子所謂王道之本者亦可見焉是以居則悅服去則見思風跡光輝於一時德聲洋溢於後世游茂先之守唐安抑用此術與虚心以接物無猜阻疑貳之釁抗志以涖事無苟簡減裂之態舉大綱以敦治體

親細務以盡下情自公府至于郊野皆得其歡知茂先待之如一家也廳宇之弊久矣每大風雨慮至推圯政間事隙謀以葺之遠倣諸侯路寢之制近遵太守黃堂之式崇庠深廣舉適準度他所毀陋從而一新樓壘得其高堅帑庾得其固密文牘充棟宇有以謹其藏賓客戾館舍有以享其安敞亭榭以資覽詠完庖突以備燕饗凡為此者蓋政有餘力而及之非先後緩急之不序也民安其居吾可以議居處之安非略於大而詳於小

也非以治舍為逆旅望望然計吾歲月以去而不恤其
他客有踐其境造其門外自西階遊目四顧雖不問俗
政可知矣譬如富家巨室垣墻立而壯門閤闢而大興
阼別而正困倉廩庫之設各得其當就而詢之必有愛
其子孫者主焉一郡之政何異於是余嘗通理此州知
土俗之淳良美風物之秀勝以謂嘉郡齊民宜得賢守
敏政乃具四美今茂先之治大槩如此故予樂為記之
茂先慷慨有遠度每以功名自期豈特區區乎此他日

去而顯矣人必思之有讀余文者亦可以慰思也

考古圖後記

呂大臨

莊周氏謂儒者逐跡喪真學不善變故為輪扁之說芻
狗之喻重以漁父盜跖詩禮發冢之言極其詆訾夫學
不知變信有罪矣變而不知止於中其敝殆有甚焉以
學為偽以智為鑿以仁為姑息以禮為虛飾蕩然不知
聖人之可尊先王之可法克己從義謂之失性是古非
今謂之亂政至於坑殺學士燔藝典籍盡愚天下之民

而後慊由是觀之二者之學其害孰多堯舜禹臯陶之書皆曰稽古孔子自道亦曰好古敏以求之所謂古者雖先王之陳跡稽之好之者必求其所以跡也制度法象之所寓聖人之精義存焉有古今之所同然百代所不得變者豈芻狗扁輪之謂哉漢承秦火之餘上視三代如更晝夜夢覺之變雖遺編斷簡僅存二三然世移俗革人亡書殘不復想見先王之緒餘至人之謦欬不意數千百年後尊彝鼎敦之器猶出於山巖屋壁隴畝

墟墓之間形制文字且非世所能知况能知所用乎當
天下無事時好事者蓄之徒為耳目奇異玩好之具而
已噫天之果喪斯文也則是器也胡為而出哉余於士
大夫之家所閱多矣每得傳摹圖寫寢盈卷軸尚病窾
啟未能深考暇日論次成書非敢以器為玩也觀其器
誦其言形容髣髴以追三代之遺風如見其人矣以意
逆志或探其制作之原以補經傳之闕亡正諸儒之謬
誤天下後世之君子有意於古者亦將有考焉

宋文鑑卷八十三

欽定四庫全書薈要卷三萬七

集部

宋文鑑卷八十四

宋 呂祖謙 編

記

撫州新建使廳記

王无咎

善為政者急其所急以及其所緩而經理於緩急之際
亦各有方不善為政者反此若夫教化以奪其未順之
心衣食以厭其必得之欲蔽不可留之獄訟恤無所告
之老窮簡閱官吏崇其善而替其惡此最其所急而不

可緩者也至於城池之所以備豫廨舍之所以興居倉庫之所以出納以及臺榭廐驛亭園之區區宜革而革宜修而修此差可以緩而不可廢者也故夫用事於一州者得宏敏周通之君子則將能周旋裁處急當其急緩當其緩常不繆於序而其間又周旋經理使其利足以掩害其損足以為益薄費而厚得近舉而遠存不然得鄙近偷惰之吏則其裁處多不能當其序而經理又不能適其宜如前之云云者此後世之通患而詛儒法

士所為發憤思古也治平二年四月五日撫州之廳成
太守司農少卿錢公暄革唐刺史危全諷之所建也盖
全諷之建當天祐之元年至今殆二百年而其勢將壞
故公始議革之而方是之時公之為州已踰年矣其政
令已行而吏民順諧歲常有年獄訟清簡公夷然無為
也於是使四縣之令各備其材而不自憚其煩繾綣督
視故能以旬有二日而成既成則其規模高廣皆踰於
舊而其始又以智損其中六楹故使坐其下者宛轉四

顧豁然虛曠稱夫臨堂堂千里者之勢其用於事而善如此真所謂宏敏周通之君子哉噫天下之有撫州而撫州之宜有治廳者固無窮而治廳之內太守迭處而迭去者亦無窮也然則今日之役不有文字之曲折以託於無窮之間則後之人孰知夫為是役者自吾錢公始而為之又適當其序且有方也故元咎承公之命不敢辭以不能而遂為之記云

定平凝壽寺塑佛記

張舜民

定平縣山不如水水不如寺寺不如凝壽山無名而水
有名寺無不得山水而凝壽居其勝水西為縣東為凝
壽負夕陽見里社重樓複道繚絡上下煙際隱顯望如
屏障間寫出故遊者不憚其勞而居者不奪其樂余始
遊寺有大明堂佛居中黃金之膚五色之衣美哉從者
具而皆土面骨立制度尚未明然余亦知其為佛之尊
也後余再遊而艮前佛之背又於壁中隱出為半見之
佛而從者非向相似而所謂九曜者為之也佛御輪乎

其中矣異矣夫九曜昭昭在天寧卑乎而顧為臣僕如是耶豈於教自有所本而余未嘗學而不能知也與又安知不曰九曜五行之正氣尚臣吾佛况於人乎故王法則曰吾不知畏而飲食男女常久之道或一受教俾之斷棄至於終身不敢復有其設術之甚無若此者矣夫此則余何能為哉至於有善地不為民居候館而多聚斯類然豈獨凝壽哉天下之所共歎者此也

大雅堂記

黃庭堅

丹稜楊素翁英偉人也其在州閭鄉黨有俠氣不少假
借人然以禮義不以財力稱長雄也聞余欲盡書杜子
美兩川夔峽諸詩刻石藏蜀中好文喜事之家素翁粲
然向余請從事焉又欲作高屋廣楹庇此石因請名焉
余名之曰大雅堂而告之曰由杜子美以來四百餘年
斯文委地文章之士隨世所能傑出時輩未有升子美
之堂者况家室之好耶余嘗欲隨欣然會意處箋以數
語終以汨沒世俗初不暇給雖然子美詩妙處乃在無

意於丈夫無意而意已至非廣之以國風雅頌深之以離騷九歌安能咀嚼其意味闖然入其門耶故使後生輩自求之則得之深矣使後之登大雅堂者能以余說而求則思過半矣彼喜穿鑿者棄其大旨取其發興於所遇林泉人物草木魚蟲以為物物皆有所託如世間商度隱語者則子美之詩委地矣素翁可并刻此於大雅堂中後生可畏安知無渙然水釋於斯文者乎

汲水新渠記

陳師道

汭句于蕭其闕如玦水經謂河至滎陽葭蕩渠出焉渠至陽武其下為沙蔡水是也其出為陰溝溝至浚儀其下為渦別為汭汭至蒙別為獲餘波迤于淮陽東厯彭蕭城于泗注謂鴻溝官度畱獲丹浚與渠一也禹塞滎澤而通渠于甫田其後河旃然入焉即索水也漢書地理志滎陽既汴水又有狼湯而受沛蒙有獲水首受畱獲至彭城入泗以余考之河渠書云自禹之後滎陽引河為鴻溝以通宋鄭陳蔡曹衛與濟汝淮泗會于楚而

竹書紀年梁惠成王入河于甫田又引而東明非禹之舊也書曰濟入于河東出于陶丘北者入而復出也溢為滎者濟之別滎波既豬障而東之也周官又謂豫之川滎洛幽兗之川河沛則河南無濟矣其謂荇蕩受濟禹塞滎陽而用河者皆失之漢志荇蕩無出留獲無始蓋畧之也余謂與經合而滎水諸書皆不載又疑渠汭為二而滎有一焉杜佑以經作于順帝之後詭誕無據而注叙渠源或河或涑或河涑合其說不一次其所經

紛錯悖戾而志亦闕略不具辨始末蓋皆不可考也自漢末河入于汭灌注兗豫永平中導導汭自滎陽別而東北至千乘入于海而河於是故瀆在新渠之南注所謂絕河而受索自此始隋開皇中因漢之舊導河于汭大業初合河索為通濟渠別而東南入于淮而故道竭今始東都受退水為臭河於畿為白溝於宋為長沙於單為石梁於徐為汭而入於南清南清故泗也蓋自三都而東畿宋亳宿單濟之間千里西來而故道淺狹春

夏不勝舟秋水大至亦不能受也蕭故附庸之國城小
不足居民又列肆於河外每水至南里之民皆徙避之
廬舍沒焉率數歲一逢民以為病紹聖三年縣令朝奉
郎張惇始自西河因故作新支為大渠合于東河以導
滯而援溺於是富者出財壯者出力日勤旬勞既月而
成邑人相與語曰渠議舊矣更數令不決而卒成於吾
侯孰有惠而不報者乎於是不詞而同欲紀於石以屬
余余謂張侯其居善守行峻而言道以成其名其仕善

義不畏不侮以登於治其可紀者多矣而諸父兄弟獨有見於來者何也夫善為治者人知其善而已至其所善蓋莫得而言也渠之興作有迹其效在今此邑人之所欲書也遂為之書

咸平縣丞廳醑醕記

張 耒

咸平五年詔以陳留之通許鎮為咸平縣先是章聖皇帝幸亳祠老子道通許築宮以待幸既為縣即以宮為令治所主簿居中書府而樞密府為尉舍熙寧某年始

置丞於是遷縣尉於外而丞居焉丞居之堂庭有醑醑
問之邑之老人則其為樞密府時所種也既老而益蕃
延蔓庇覆占庭之大半其花特大於其類邑之醑醑皆
出其下蓋其當時築室種植以待天子之所必有珍麗
可喜之物而後敢陳是以獨秀於一邑而莫能及也每
思唐自天寶以至於周厯歲數百天下未嘗無戰其治
安僅足以小康而禍敗嘗至於大亂自安史以來藩鎮
四據而天下無完國降及其末分裂攘奪至五季而中

原正朔之所加僅止門閭之中惟我藝祖神宗受天休
命神武四達馬首所向破滅摧伏於是斷百年之蟠據
合厯世之分裂數百年間禍根亂源薙剪堙塞大掃而
無餘矣肆我章聖皇帝誕承祖武以無忌大功寬賦薄
征順天養民四方無虞休養滋息如人之疾病蠱敗醫
者既已擊逐鉤取其累年之蠹矣而後為之調和撫養
安居美食以使之豐腴而堅強也由是觀之自開元以
來至於章聖而天下之人始復見大治之全國嗚呼亦

可謂盛矣於是封太山禪梁父祀后土祠老子徜徉四方以明示得意聞之古者天子巡幸所至郡國必建原廟所以廣孝示後世而况當太平之盛時講一世之大禮八鸞之所經六龍之所駐可以昭後世示子孫以為歷代之大訓成法者宜何如哉是宜一草木一瓦礫皆當護守保藏無敢棄壞以無忘祖宗駿功成烈而使知夫百餘年間地平天成養生送死無憾者誰之力也酖醢之生當是時盖嘗沾雨露之濡近日月之光與夫旌

頭屬車皆為一時之物矣可不愛哉

雙槐堂記

張 耒

古之君子其將責人以有功也必使之樂其職安其居
以其優游喜樂之心而就吾事夫豈徒苟悅之哉凡人
之情其將有為也其心樂而為之則致精而不苟雖殫
力費心而不自知故所為者有成而無難古之御史也
為法不苛其勤惰踈密隨其人之所欲而吾獨要其成
是古之循吏皆能有所建立夫望人以功而使其情愁

沮不樂求捨去之不暇誰肯以其怨沮不平之心而副我之所欲哉頃時余見監司病郡縣之政不立扼腕盛怒曰是惟飲食燕樂處游觀之好吾日夜以法督責之使無得一於此一歲之日數計吾從而課率之使無得有頃刻之間以約束為不足而繼以辱罵辱罵為不足而繼以訊詰方此時吏起不待晨卧不及暖廢飲食冒疾病屋室敗漏不敢修完器用弊乏不敢改作其勤苦如是猶不足以當其意宜其郡縣之政無所不舉小大

得職而民物安堵矣然吏益姦民益勞文書具於有司而事實不立吏足以免其身之責而民不知德相為欺紿以善一時而監司卒亦不得而察也豈非其所為者無至誠喜樂之心出於畏罪不獲已苟以克職故耶其事功之滅裂如此理固然也酸棗令王君治邑有能名以其餘力作燕居之堂灑掃完潔足以宴賓客閱圖書庭有雙槐因以為名夫王君豈以謂苟勞而無益不若暇佚而有功將安其居樂其身以其獄訟簿書之間與

賢士大夫彈琴飲酒歡欣相樂舒心而養神使其中裕
然然後觀物圖其致用意於文法尋尺之外以追古循
良君子之風以大變俗吏之弊而為之哉夫古之善為
政者不佚而常安不勞而善成吾知王君其有得於此矣
於是為之書

照碧堂記

晁補之

去都而東順流千里皆桑麻平野無山林登覽之勝然
放舟通津門不再宿至於宋其城郭闌閑人民之庶百

貨旁午以視他州則浩穰亦都也而道都來者則固已
曠然見其為寬閒之土而樂之豈特人情倦覲於其所
已饜而欣得於其所未足將朝夕從事於塵埃車馬之
間日昃而食夜分而息而若有驅之急不得縱而與之
偕者故雖平時意有所樂而不暇思及其脫然去之也
亦不必山林遠絕之地要小休而整適則人意物境本
暇而不遽蓋向之所樂而不暇思者不與之期一朝而
自復其理固然此照碧堂之所以為勝也宋為本朝始

基之地自景德三年詔即府為南都而雙門立別宮故
經衢之左為留守廨面城背市前無所達而後與民語
接城南有湖五里前此作堂城上以臨之歲久且圯而
今龍圖閣學士南豐曾公之以待制留守也始新而大
之蓋成於元祐六年九月癸卯橫七楹深五丈高可建
旄自東諸侯之宅無若此者先是南都歲賜官僚賓客
費為錢七千緡公奉已約亦不以是侈厨傳故能有餘
積以營斯堂屹然如跳出堞上而民不知以放懷高蹈

寓目而皆適其南汴渠起魏迄楚長堤迤靡帆檣隱見
隋帝之所以流連忘返也其西商丘祠陶唐氏以為火
正曰閼伯者之所以有功而食其墟也其東雙廟唐張
巡許遠捍城以死而南霽雲之所以馳乞救於賀蘭之
塗也而獨梁故苑複道屬之平臺三十里者名在而跡
莫尋雖隋之疆亦其所守渠在耳豈汰靡者易熄而勲
名忠義則愈遠而彌存不可誣哉初補之以校理佐淮
南從公宴湖上後謫官於宋登堂必慨然懷公拊檻極

目天垂野盡意若遐驚太空者花明草薰百物媚斌湖
光瀾漫飛射堂棟長夏畏日坐見風雨自堤而來水波
紛紜柳搖而荷靡鷗鳥盡僂客顧而嬉條然不能去盖
不獨道都來者以為勝雖饜於吳楚登覽之樂者度淮
而北則不復有至此亦躊躇徜徉而喜矣夫人之感於
物者同而所以感者異斯須為之易意樂未已也哀又
從之故景公美齊而隨以雪涕傳亦曰登高遠望使人
心悴然昔之豪傑憤悱憂世之士或出於此若羊祜太

息峴山之顛固可人其志有在未可但言哀樂之復也
公與補之俱起廢而公為太史氏補之亦備史官間相
與語斯堂屬補之而公再守記之南都補之守河中書
來及焉補之嘗論昔人所館有一日必葺去之如始至
者有不掃一室者夫一日必葺以為不苟於其細則將
推之矣不掃一室以為有志於其大則不可必卒之其
成功有命則姑與蕃之賢於此乎未辨廼公之意則曰
吾何有於是從吾所好而已矣二累之上也名肇字子

開文學德行事君行已為後來矜式其出處在古人中其欲有焉在天下後世其卷而施之一郡不以自少而以自得又樂與人同者如此堂不足道也

新城遊北山記

晁補之

去新城之北三十里山漸深草木泉石漸幽初猶騎行石齒間旁皆大松曲者如蓋直者如幢立者如人卧者如蚪松下草間有泉沮洳伏見墮石井鏘然而鳴松間藤數十尺蜿蜒如大蛇其上有鳥黑如鴟鵂赤冠長喙

俛而啄磔然有聲稍西一峰高絕有蹊介然僅可步繫
馬石觜相扶携而上篁篠仰不見日如四五里乃聞雞
聲有僧布袍躡履來迎與之語睟而顧如麋鹿不可接
頂有屋數十間曲折依崖壁為欄楯如蝸鼠繚繞乃得
出門牖相值既坐山風颯然而至堂殿鈴鐸皆鳴二三
子相顧而驚不知身之在何境也日莫皆宿於時九月
天高露清山空月明仰視星斗皆光大如適在人上窗
間竹數十竿相摩戛聲切切不已竹間梅棕森然如鬼

魅離立突鬢之狀二三子又相顧魄動而不得寐遲明
皆去既還家數日猶恍惚若有遇因追記之後不復到
然往往想見其事也

高廟碑陰記

唐 意

滁之西曰豐山其絕頂有漢高廟或云漢諸將追項羽
道經此山至今土俗以五月十七日為高帝生日遠近
畢集薦肴觴焉意嘗從太守侍郎曾公禱雨於廟因讀
庭中刻石始知昔人相傳蓋以五月十七日為漢高帝

忌日按漢書高帝十二年四月甲辰崩於長樂宮五月

丙寅葬長陵

注自崩至葬凡二十三日

疑五月十七日必其葬日又

非忌日也以厯推之自上元甲子之歲至漢高帝十二

年四月晦日

是年歲次丙午

凡積一百九十三萬六千三百六

十三年二千三百九十四萬九千五百九十一月七億

七百二十四萬六千八十五日以法除之算外得五月

朔己酉十七日乙丑則丙寅葬日乃十八日也班固記

漢初北平侯張蒼所用顓帝厯晦朔月見弦望滿虧多

非是故高帝九年六月乙未晦日食夫日食必於朔而食於晦則先一日矣豈非丙寅乃當時十七日乎不然歲月久遠傳者之失也遂以告公命刻其碑陰

拱北軒記

鄒浩

拱北軒者所居對堂之小軒也昭人屋向皆東南獨此居面北軒又正在北方先聖言北辰居其所而衆星拱之故取以名焉因竊自念君者北辰也拱者也羣臣者衆星也拱之者也今在內為輔弼為侍從為六曹寺監

之屬拱北可也。在外為監司為守令為諸路郡邑之屬拱北可也。而浩則名除於仕版，身廢於災荒，既已隕墜而為石矣，尚奚麗天者之擬耶？又竊自念所除者名耳，拱北之心未嘗除也。所廢者身耳，拱北之心未嘗廢也。夫未嘗除而自除之，未嘗廢而自廢之，非浩所忍為也。浩於是軒朝夕焚香稽首再拜上祝皇帝壽千萬歲，長與天同久，與地並拱。于內者輔弼盡，輔弼之道侍從盡。侍從之宜六曹寺監之屬盡，所以為六曹寺監之職拱。

於外者監司盡監司之分守令盡守令之才諸路郡邑之屬盡所以為諸路郡邑之務上下相承如源流之一水先後相應如首尾之一形自京師而環矚之雖遠在蠻夷戎狄之外猶在四序平萬物遂重譯效貢拱我聖人而况九州之內乎和氣浮於上則景星見卿雲飛和氣動於下則朱草生醴泉湧凡是祥瑞之物莫不紛綸畢至祖宗之功德由此而彌光廟社之安榮由此而彌固前古以來未有太平若此其盛焉浩之所以拱北在

是而已且既以為石矣亦必有觸之而起者始自膚寸旋克太虛於時滂沱未必無助然則區區素定之心又安敢自棄而莫之篤與又竊系以詞曰七曜兮可西五嶽兮可移我心湛然分如初時我不見窮達得喪之殊塗兮惟拱北之知噫高高無私兮日監在茲

易庵記

唐庚

客問陶隱居吾欲注周易本草孰先隱居曰易居先客曰何也隱居曰注易誤猶不殺人注本草誤則有不得

其死者矣世以隱居為知言與吾之說大異蓋六經者君本之致治也漢時決疑獄斷國論悉引經術茲豈細故而易言哉本草所以辨物六經所以辨道道者物之所以生萬物者人之所資以為生一物之誤猶不及其餘道術一誤則無復子遺矣前世儒臣引經誤國其禍至於伏尸百萬流血千里本草之誤豈至是哉注本草誤其禍疾而小注六經誤其禍遲而大隱居注本草矣故知本草之為難而未嘗注經故不知經為尤難而不

可率易如此世以不服藥為中醫此言雖小可以喻大
吾用易不審陷難幾死今幸閒廢方且據庵熟讀而深
思之復書此二本其一以自警其一以寄二子焉

顏魯公祠堂記

唐 庚

上元中顏公為蓬州長史過新政作離堆記四百餘言
書而刻之石壁上字徑三寸雖崩壞剝裂之餘而典刑
具在使人見之凜然也元符三年余友強叔來尹是邑
始為公作祠堂於其側而求文以為記余謂仁之勝不

仁久矣然有時乎不勝而反為所陷焉命也史臣論公
晚節偃蹇為姦臣所擠見隕賊手是未必然公孫丞相
以仲舒相膠西梁冀以張綱守廣陵李逢吉以韓愈使
鎮州而盧杞以公使希烈其用意正相類爾然於數君終
不能有所傷而公獨不免於虎口由是觀士之成敗存
亡豈不有命耶而小人軒然自以為得計不亦謬乎且
吾聞古之尚友者以友天下善士為未足又尚論古之
人誦其詩讀其書思見其人而不可得則方且欲招屈

子於江濱起士會於九原蓋其志所願則超然慕於數
千百載之後而况於公乎公之功名事業已絕於人而
文學之妙亦不可及因其心畫之所在而祠之此昔人
尚友之意也嘗試與強叔登離堆探石室觀其遺迹而
味其平生則公之精神風采猶或可以想見也夫

絳州思堂記

張 繹

金臺太守時侯默而好深沉之思下車之六月作堂於
治所之東偏命之曰思且將進思盡忠退思補過以盡

吾之才也客有難者曰天下何思何慮同歸而殊塗一
致而百慮天下何思何慮而子欲思之耶侯笑曰公知
其一未知其二靖共爾位好是正直神之聽之介爾景
福人道之常也吾又何思日往則月來月往則日來天
道之常也吾又何思子見世之人矯情亂志拂類以成
其行者乎富貴之未來則為之巧語軟熟視人有詡詡
乞憐之色不得則戚戚以為憂患難之來則為悲愁無
聊之聲鼠匿鳥伏若不可容以僥倖險阻之萬一不得

則戚戚以為憂嗚呼是未來者果可來而既來者果可
去耶夫為不知有是理而強思之也天下始紛紛多事
矣是所謂憧憧往來朋從爾思是也子所謂不思殆謂
是與客曰然侯曰子徒知有不可思而強思之庸詎知
當思而不思又患之大也耶客愕然侯指曰子見庭中
之杏當未春時橐然一枯株耳然則春而華秋而落果
何有耶子能思其所以華思其所以落則死生之理盡
矣子見坐隅之燭當中夜晰晰可以見幽隱仆之則瞋

目不見丘山果何物耶子能思其所以見思其所以不見則鬼神之理盡矣孔子所謂學而不思則罔孟子所謂思則得之不思則不得是也不然子欲捨是而求道家者流浮屠之說去人情絕思慮塊然坐乎窮荒之域視吾君臣父子泛泛若江湖之適相值也顏靡壞蕩不自收斂且曰吾之道將自同於獸死木爛而已吾又何思嗚呼是道也吾不知其果何道也耶而子不願學之耶於是客始茫然自失因拊髀而為之歌曰春雨濕兮

花卉香秋風落兮露以霜一往一來天地之常彼不知
兮何自苦而茫茫思乎思乎吾君臣父子兮真道之奧
而德之光客去侯懼其言之不傳也樂與學者共之也
遂命壽安張繹記之河南吳僅書之

宋文鑑卷八十四

欽定四庫全書薈要卷二萬八

集部

宋文鑑卷八十五

宋 呂祖謙 編

序

重修說文序

徐 鉉

臣徐鉉等奉詔校定許慎說文十四篇并序目一篇凡萬六百餘字聖人之旨蓋云備矣稽夫八卦既畫萬象既分則文字為之大輅載籍為之六轡先王教化所以行於百代及於物之功與造化均不可忽也雖復五帝

之後改易殊體六國之世文字異形然猶存篆籀之迹
不失形類之文及暴秦苛政散隸聿興便於末俗人競
師法古文既絕譌僞日滋至漢宣帝時始命諸儒修倉
頡之法亦不能復故光武時馬援上疏論文字之譌謬
其言詳矣及和帝時申命賈逵修理舊文於是許慎采
史籀李斯揚雄之書博訪通人考之於賈逵作說文解
字至安帝十五年始奏上之而隸書行之已久習之益
工加以行草八分紛然間出近以篆籀為奇怪不復經

心至於六籍舊文相承傳寫多求便俗漸失本原爾雅
所載草木魚鳥之名肆意增益不可觀矣諸儒傳釋亦
非精究小學之徒莫能矯正唐大厯中李陽冰篆迹殊
絕獨冠古今自云斯翁之後直至小生此言為不妄矣
於是刊定說文修正筆法學者師慕篆籀中興然頗排
斥許氏自為臆說夫以師心之見破先儒之祖述豈聖
人之意乎今之為字學者亦多從陽冰之新義所謂貴
耳賤目也唐末喪亂經籍道息皇宋膺運二聖繼明人

文國典粲然光被興崇學校登進羣才以文字者六藝之本固當率由古法乃詔取許慎說文解字精加詳校垂憲百代臣等愚陋敢竭所聞蓋篆書堙替為日已久凡傳寫說文者非其人故錯亂遺脫不可盡究今以集書正副本及羣臣家藏者備加詳考有許慎注義序例中所載而諸部不見審知漏落悉從補錄復有經典相承傳寫及時俗要用而說文不載者承詔附益之以廣篆籀之路亦皆形聲相從不違六書之義者其間說文

具有正體而時俗譌變者則具於注中其有義理乖舛
違戾六書者並序列於後俾夫學者無或致疑大抵此
書務援古以正今不徇今而違古若乃高文大冊則宜
以篆籀著之金石至於常行簡牘則草隸足矣又許慎
注解詞簡義奧不可周知陽冰之後諸儒箋述有可取
者亦復附益猶有未盡則臣等粗為訓釋以成一家之
學時未有反切後人附益互有異同孫愐唐韻行之已
久今並以孫愐音切為定庶夫學者有所適從食時而

成既異淮南之敏懸金於市曾非呂氏之精塵瀆聖明
若臨冰谷謹上

贈麴植彈琴序

柳開

我聽子之琴實聞其聲不能知子琴之音也獨坐永日
泠然不休嗟乎我是病於子矣子本謂我能知其音將
欲宣其心而達其志也豈徒然乎子為我悲矣不幸因
子琴之悲而竊自感而自悲也子果能為我而聽其言
乎子之琴有似于我之文也力學十餘年非古聖賢人

之所為用心者不敢安於是學成而業精行修而德廣
希於古之知己者不可從而見也徒勤勤而至於今矣
尤人乎不知我誠之而莫所遂其求也甘自放於東郊
矣聽子之琴感我之悲也亦將自尤而自責矣又何外
尤於他人乎始自求於人今知己之為過也棄俗尚而
專古者誠非樂於人而取其貴者也獨宜其自知而自
樂矣用是而得與子言乎子以琴之能見於我也將謂
我能其音而辨其功矣我豈果能專為子識其音而辨

其功乎易子之願也我亦如是矣我聽子之琴尚不能識其音而辨其功矣人豈反能觀我之文也而能為我行其言而盡其道乎故知人不我知者亦無尤也與子務於古者也知之者不足取於外也誠乎已而已子聞此之言固亦信哉我之感而悲不為妄也子試為我而思之將見亦鳴而不禁矣

龍圖序

陳搏

且夫龍馬始負圖出於義皇之代在太古之先也今存

已合之位或疑之况更陳其未合之數耶然則何以知

之答曰於仲尼三陳九卦之義探其旨所以知之也

九卦

謂履謙復恒損益困井巽之九卦也

况夫天之垂象的如貫珠少有差則

不成次序矣故自一至於盈萬皆累累然如係之於縷

也且若龍圖本合則聖人不得見其象所以天意先未合而形其象聖人觀象而明其用是龍圖者天散而示之伏羲合而用之仲尼默而形之始龍圖之未合也惟五十五數上二十五天數也中貫三五九外包之十五

盡天三天五天九并十五之用後形一六無位

上位去一下位

去又顯二十四之為用也茲所謂天垂象矣下三十地

數也亦分五位

五位言四方中央也

皆明五之用也

上位形五十下位形六十

分而為六

五位六五三十數也

形坤之象焉

坤用六也

六分而幾四象

成七九八

地六不配

謂中央六也一分在南邊六幾少

六之四象
分在西邊六幾老陽九惟在北邊

在上則一不用形二

六便成老陰數更無外數添也

十四在下則六不用亦形二十四

上位中心去其一見二十四下位中心去

其六亦見二十四以一歲三百六旬周於

後既合也天

二十四氣也故陰陽進退皆用二十四

一居上為道之宗地六居下為氣之本

一六上下覆載之中運四十九

之數為造化之用也

天三幹地二地四為之用

此更明九六之用謂去三統地二地

四幾九為乾元之用也九幹五行幾數四十是謂大衍之數五十其用四十有九也

三若在陽則

避孤陰在陰則避寡陽

成八卦者三位也謂一三五之三位二與四只兩位兩位則不

成卦體是無中正不為用也二與四在陽則為孤陰四二是也在陰則為寡陽七九是也三皆不處之若避之

也
大矣哉龍圖之變歧分萬塗今略述其梗槩焉

奕碁序

宋 白

投壺博奕皆古也禮經有文仲尼稱奕之事下無益於

學殖上無裨於化源然觀其指歸可以喻大者也故聖人存之觀夫散木一秤小則小矣於以見興亡之基枯槩三百微則微矣於以知成敗之數是故奕人之說有數條焉曰品曰勢曰行曰局品者優劣之謂也勢者彊弱之謂也行者奇正之謂也局者勝負之謂也品之道簡易而得之者為上戰爭而得之者為中孤危而得之者為下勢之道寬裕而陳之者為上謹固而陳之者為中懸絕而陳之者為下行之道安徐而應之者為上疾

速而應之者為中躁暴而應之者為下局之道緩而勝之者為上變通而勝之者為中刼殺而勝之者為下品之義有淺深定淺深之制由乎從時勢之義又有踈密分踈密之形由乎布子行之義又有利害審利害之方由乎量敵局之義又有安危決安危之理由乎得地時有去來乘則得之過則失之子有向背遠則斷之盛則窮之敵有動靜緩則守之急則攻之地有廢興多則破之少則開之能從時者無不濟能布子者無不成能量

敵者無不勇能得地者無不强然從時之權戒乎遷布
子之權戒乎欺量敵之權戒乎忽得地之權戒乎貪無
謂品高而怠其志怠即將卑無謂勢大而驕其心驕即
將羸無謂行長而泄其機泄即將疲無謂局盛而怠其
敗怠即將危若然則制術於未形之前識宜於臨事之
際轉禍於垂亡之間具此道者為善奕乎引而伸之可
稽於古彼簡易而得之寬裕而陳之安徐而應之舒緩
而勝之有若堯禪舜舜禪禹乎彼戰爭而得之謹固而

陳之疾速而應之變通而勝之有若湯放桀武王伐紂
乎彼孤危而得之懸絕而陳之躁暴而應之刼殺而勝
之有若秦併六國項王霸楚乎是故得堯舜之策者為
首得湯武之訣者為心得秦項之計者為趾焉抑從時
有如設教布子有如任人量敵有如馭衆得地有如守
國其設教也在寬猛分其任人也在善惡明其馭衆也
在賞罰中其守國也在德政均至於怠志而驕心泄機
而怠敗非止圍碁將規家國焉故曰奕之事下無益於

學殖上無裨於化源然觀其指歸可以喻大者也故聖人存之

御覽序

田 錫

臣聞聖人之道布在方策六經則言高旨遠非講求討論不可測其淵深諸史則跡異事殊非參會異同豈易記其繁雜子書則異端之說勝文集則宗經之辭寡非獵精以為鑒戒舉要以觀會同可為日覽之書資於日新之德則雖白首未能窮經矧王者機務餘暇端拱穆

清所宜不勞躬而得稽古大端不煩覽而達為理大意
臣每讀書思以所得上補達聰而天啟微衷神佑私志
近因宣召面得敷陳可以銘於座隅者書於御屏可以
用於帝道者錄為御覽今經取帝王易曉之意史取帝
王可行之事子或總於雜錄集或附之逐篇悉求切當
之言用達精詳之理覽之詳其義則事與機會用之得
其時則名與功偕冀以塵露之微上裨高深之德即嗣
聖功業與堯舜比崇生靈富壽在義軒之上

留別知己序

向敏中

古者無患身不立患道之不彰偉哉達士之格言人倫之妙端也敏中始學於六經舊史氏見砥名勵行濟時於有道者則臨文慨慕景遺範而耿光見竊榮冒進致身於非據者則執卷窮微想前事而太息頃歲嘗侍立於先人謂予曰矜功者弗立僥望者弗成無徇俗以強媒苟名而自是三省前訓克荷靡忘暨予忝官聿來南夏終朝若厲臨事且繁愍地千里成賦百萬編民剛勁

庶務稠雜約乎風土陋豫章之奧壤比其并制越金陵
之上邦布術懜從繩之理化民無偃草之謠迅速周天
迭換四稔忽奉宸詔俾歸闕庭駕言于邁中心鬱然同
年執友通才巨儒咸賦以序文歌詩送別者多矣其間
探味述作希閱詞旨大約以踐清華居近密名器偉重
組紱超峻為進身之望也激揚之意雖知己之虛談潤
色之詞復文人之恒態豈若出直言以誠之垂有益以
喻之使敏中于太平之朝彰其道成其業去邪助正嫉

惡揚善移風以變俗悛偽以復古則可矣將逮於竊榮
冒進之輩豈可得乎況立性甚拙揣心愈踈嘗以居人
臣之位握刑賞之柄煥耀當世貴飾後昆者宜乎富於
道德飽於忠鯁求於至理盡於至公然後不求名而名
自彰也不竊榮而榮自至也設不能量力以再思約已
以務進逐本徇末爭利忘義心為蠹螫面作狐狸縱我
冠鳴珮左金右玉上倚千尋一去九萬躡跡於賢人君
子之右者復不愧歟願言故交勉樹令德俟他日將前

言以辨釋之則知敏中平生之志有在矣

柳如京文集序

張景

一氣為萬物母至於陰陽開闔噓吸消長為晝夜為寒暑為變化為死生皆一氣之動也庸不知幹之而致其動者果何物哉不知其何物所以為神也人之道不遠是焉至道無用用之者有其動也故為德為教為慈愛為威嚴為賞罰為法度為立功為立言亦不知用之而應其動者又何物也夫至道潛於至誠至誠蘊於至明

離潛發蘊其至而不知所至者非神乎哉堯舜之揖讓
湯武之征伐周公之制禮樂孔子之作經典孟軻之拒
楊墨韓愈之排釋老大小雖殊皆出於不測而垂於無
窮也先生生於晉末長於宋初拯五代之橫流扶百世
之大教續韓孟而助周孔非先生孰能哉先生之道非
常儒可道也先生之文非常儒可文也離其言於往跡
合其旨於前經破昏蕩疑拒邪歸正學者宗信以仰以
賴先生之用可測乎藏其用於神矣然其生不得大位

不克著之於事業而盡在於文章文章蓋空言也先生
豈徒為空言哉足以觀其志矣今緝其遺文九十五篇
為十五卷命之曰河東先生集先生名氏官爵暨行事
備之行狀而繫於集後

送魯推赴南海序

穆修

為人之佐其難矣哉夫令而行者其長之所專也從而
輔之者其佐之所守也凡政有害於公有悖於理而必
言已之可為耳言而必從豈已之所能哉苟上無必從

之道則政有必失之患為其佐者罪先及之故曰為人
之佐其難矣哉然則如何其可也曰盡其職而已矣上
焉者賢已當公而輔之不賢已當公而正之賢不賢自
主彼之材輔與正非已之職與正之而不從則雖獲罪
及有之矣於其職也實無媿焉今之從事二人者或莫
率是道不涉於欺則陷於隨居上者其人果賢其政果
明是宜順之於下以成其美已則曰我為人佐遂能無
一言為之損益吾何以食其官即強出白黑以紛亂之

此非欺而何居上者其人果不賢其政果不明是宜直之於下以救其過已則曰我為人佐言不吾專力與為敵徒速悔累曷若附離唱和取容免責苟全吾位而去此非隨而何予謂士之居其位事其人既不可欺亦不當隨不欺不隨唯職所宜而已矣魯君以辭學中名自邑佐而遊郡幕皆有所稱今將復佐於南海南海際南之鉅府也方聞其長則是天下諫臣賓接僚屬當獎正與直用是以往志必上行苟上下協公以從於理余見

南海之政獨追於古而荒夷之民浹其惠也

唐柳先生文集後序

穆修

唐之文章初未去周隋五代之氣中間稱得李杜其才始用為勝而號專雄歌詩道未極其渾備至韓柳氏起然後能大吐古人之文其言與仁義相華實而不雜如韓元和聖德柳平淮西雅章之類皆辭嚴義偉製述如經能率然聳唐德於盛漢之表蔑愧讓者非二先生之文則誰與予少嗜觀二家之文常病柳不全見於世出

人間者殘落纔百餘篇韓則雖目其全至所缺墜亡字
失句獨於集家為甚志欲補得其正而傳之多從好事
訪善本前後累數十得所長輒加注竄遇行四方遠道
或他書不暇持獨齎韓以自隨幸會人所寶有就假取
正凡用力於斯已蹈二紀外文始幾定而唯柳之道疑
其未克光明於時何故伏其文而不大耀也求索之莫
獲則既已矣於懷不圖晚節遂見其書聯為八九大編
夔州前叙其首以卷別者凡四十有五真配韓之鉅文

與書字甚樸不類今蹟蓋往者之藏書也從考覽之或
卒卷莫迎其誤脫有一二廢字由其陳故劇滅讀無甚
害更資研證就真爾因按其舊錄為別本與隴西李之
才參讀累月詳而後止嗚呼天厚予嗜多矣始而饜我
以韓既而飫我以柳謂天不吾厚豈不誣也哉世之學
者如不志於古則已苟志於古求踐立言之域捨二先
生而不由雖曰能之非予所敢知也天聖九年秋七月
河南穆修伯長後序

景祐鹵簿圖記序

宋 綬

古者黃帝創冕服之容列營衛之警輿駕儀物蓋本於此唐堯彤車有虞鸞和夏后之綏商人之輅周官有司常巾車之職虎賁旅賁之從三五之際其所由來尚矣秦六國兼屬車九九之數漢上甘泉備千乘萬騎之衆自時厥後損益可知歷李唐之艱屯接五代之卑替風流文物蕩然罕餘我藝祖挺神武之姿膺樂推之運霆斷電掃王略載清繇蒞示天子之尊黃屋削諸侯之僭

始議郊饗即諫典文宰司儒臣討求揚摧補緝漏目崇飾新規扞衛既雄羽儀兼備初吏士所服皆用畫帛被襲且久污蟻不鮮乃命易以厚繒加之文繡采綵相錯煥乎一時若繼代相傳洎代國所得於古戾者必褫去其制朴者必增華自是天時報功洛壇拜貺遺老嗟覩舊章頓還二宗繼猷慎守丕則柴泰兆耕東廛篆石仙閭薤牲汾潁順風訪道案厯上陵巡祭便蕃威容震耀羽旄輿馬咸慰夫東西人之望焉在昔蔡邕十志首著

車服之目范畢續成其事史官頗續此作其旁記別錄
又有董巴徐廣周遷數家中朝江左亦嘗圖鹵簿至道
中詔翰林承旨宋白與內侍畫郊丘仗衛緘在秘府景
德中資政殿學士欽若上鹵簿記三卷敕付太史蓋古
今之論其詳可得而覩皇上紹庭正統拱已中宸睿德
天成而日躋洪化火馳而風偃崇儒嚮學文之經也講
兵訓士武之畏也奉先登侑禮之大也度曲接神樂之
廣也包文武以居業總禮樂而播憲則清光景鑠可臆

度而遽數哉粵再郊之明年命華光侍臣圖寫大簿是時臣充儀仗使督攝容衛又以友僕奉車承被顧問官守之事得以周知乃與侍讀馮元侍講孫奭議曰前二圖書寫形紀事不相參會蓋象設而又文陳乎繇是著為圖記十篇名物夥多但續其居首者非有小異不復重出先標其形制後載其因造有未周盡復具於末篇別依兵部字圖畫橫幅其軸纖悉無漏合丹青而不亂非見聞之異辭天行星陳莫斯為盛嘻夫聖人制情之

動防民之踰為之辨貴賤名數之差著陟降進止之節
訓之以物則顯之以器故方軫圓蓋以觀法象鏤錫辰
旂以昭聲明寢兕持虎以養其威升龍左肅以副其德
天下尊之百官奉之邪心弗萌亂原以消非謂尚文貌
之繁矜紛華之飾我后之置圖自正觀右作鑒者其是
之謂與歲在戊寅燔祀有期敕內省副鑒監逮屬艱難
常從領護其屬重飾帝車爰及法物並加釐正詢博士
之論擇國工之工巧惟藻絢臻夫典美臣又適分使節

專職禮儀因念曩編宜益今制而名標天聖事從景祐
義則非順理常改為輒取近所修正各附其下他即如
舊仍以新改之初元冠其篇題表一王而大居正也薦
塵衡石之覽將謹名山之藏庶幾裨中經丙部之餘為
官注一家之說爾

輔弼名對序

劉 顏

昔者三王咸設四輔一曰師二曰保三曰疑四曰丞
居左右前後各主訓護論思又建三公以總百揆書曰

夢帝賚予良弼又曰弼予一人是四輔三公九卿通謂之輔弼故西漢汲黯曰天子置公卿輔弼之臣寧令從諛承意陷主於不義乎則三公九卿通謂之輔弼明矣皆所以勗仁勸道補政益德申朝廷之大義固社稷之長策致君上於無過措國家於不傾出入詢謀言動獻替者也是以持平守正審情切事中於時病合於物心一言之發足以廣其聰明一語之行足以垂其法度此乃輔弼之臣應對之名者也苟其不善過與不及之者

或有問大而應細詢要而對迂訪真而述偽容易而答難若是欲聰而塞欲明而昏法度可垂未之聞也夫子曰舜好問好察邇言謂近言而善者察而行之蓋得其情實適於理致不必奇遠然後聽從此古之帝王求其論說之本意也夫舜與三王治殊而道邈論說之語質略而深末塗難守惟漢至五代跡顯而時近問答之辭聞見者洽後世易法可酌中道垂訓來世顏切不付揆私務纂述失意窮處宅心遺事探經濟之策考撫實之

議斷自西漢迄于周朝凡一十九代之君臣僅千二百年之問答皆朝廷之至務社稷之令猷或關治亂以發明或繫安危而辨列足以施諸廊廟利於國家經久可行本末具載凡四十門門中各起類例以陳警策又為序論以示抑揚其下或逐臣或逐事有所隱塞曲為申明并目錄共四十一卷命曰輔弼名對其間亦有位非公卿言是輔弼不可廢者兼而錄之又有虛論浮談讒言輕議雖輔弼之士亦不取焉且太史吳兢撰貞觀政

要止述太宗一朝又宰相趙瑩著君臣正論惟載唐室
一代其實多採章䟽不能純取問答且章䟽多則有疎
間之弊問答少則失親切之詳以至虛論浮談讒言輕
議錯雜其間精粗相半將恐垂訓不廣而取信不深故
自歷朝專採名對庶幾賢人君子輔弼聖帝明王詢于
芻蕘無棄顛顛也已

送張損之赴任定府幕職序

劉牧

我國家以仁策馴有北四十年矣歲時遣使挈詞幣修


聘事焉朝廷有大慶及大事亦罔不與足蹈吾境目觀
吾民歛手帖帖如家人焉故朔方之民往往老者忘父
兄之讐而壯者不識戰鬪事何以言之長老常為牧言
邊防事云兩河間夷未通好時其民過鄰里親舊家必
帶刀劍霜降農閑里胥鄴長會民習古戰陣之法居常
畜健馬乾食冠至裹糧持劍帶甲上馬不悔戰死以怯
為恥通好後中年戴白之叟入武庫指兵器亦尚能辨
其名物與其使用當時老者今已死矣當時壯者今已

老矣子孫生來見聞保障不驚城池不完開門逢迎不
相危疑食稻衣錦養移於體雖其風俗耐辛苦尚武勇
而無事以來習熟為然亦少殆矣朝廷既以朔方為安
凡沿邊郡縣文武之任循例而授士之從政選懦不材
者貪其飲食賜予十倍內郡不憚其去輕揚急進者貪
其階緣知遇其勢易獲亦十倍內郡咸樂其補故今言
邊任者粉墨雜糅矣噫凡人有家雖無事時未嘗一日
不嚴門庭之限藩籬之固其與人也雖親戚交善許相

死生亦不忘去內外之別川者腰舟具焉山者獸獲存
焉為人牧民者如之何不之思也在易復象曰先王以
至日閉關商旅不行釋者謂四夷為中國之陰王者必
却而外之先王閉關而却外所以擬其象也必至日者
果陽長陰消之際設備務速明不可後時也商旅不行
小人喻於利亦防奸之謂也天之愛民久矣必為生智
者以謀之損之是行豈貪飲食速知遇之徒與損之居
常與人言必慷慨時事今其行有日同年友弟劉牧取

酒酌勸侑以言曰今夷人保信誓河北固無恙第其民之疾苦治之得失物之利害將盡忘之乎而又職事官之任平居時則投壺雅歌奉樽俎之驩與記奏之事在軍旅則參謀畫擁楯騎馬而裁檄書北方多賢諸侯如訪損之以政者則當思所以應之勉樹功名無為具腰舟設獸獲者笑之

宋文鑑卷八十五



總校官庶吉士_臣張能照

校對官助教_臣汪錫魁

謄錄監生_臣黃佑